

Pirengo pya Yezu Kirixtu

Os Milagres de Jesus Cristo



Livro para novos leitores na língua Cisena
Níveis 1 e 2

Ilustrações

Ilustrações: International Illustrations, The Art of Reading 2.0, © SIL International, 2001

Páginas: 3, 8, 10, 11, 15, 21, 23, 24.

Ilustrações: Danielle Rettich

Páginas: 5, 6, 7, 13, 14, 17, 18, 19, 20, 25, 26, 27, 28, 29, 30, 31, 32

Ficha Técnica:

Título: Pirengo pya Yezu Kirixtu
 (Os Milagres de Jesus Cristo)
 (The Miracles of Jesus)

Língua: Cisena

Ilustrações: Art of Reading 2.0

Primeira edição electrónica, 2010


Produzido por: Prodelise
 lidemo.net@gmail.com
 C.P. 652
 Nampula, Nampula
 Moçambique

O utilizador pode copiar e distribuir a obra

Cirengo Ca Kumedza

(A Pesca Milagrosa)

Pisagumanika muna Luka 5:1-11



Yezu akhali nkhundu-nkhundu mwa gombe ya Djenezareti. Iye akhapfunzisa anthu azinji. Alonga na thangwi ya fala ya Mulungu. Anthu akhafinyana, akhafuna khala dhuzi naye. Yezu apita m'mwadiya. Anacinthu mwadiya akhali anyakumedza. Iyo akhasuka makokota awo. Yezu abvundza Simoni (mwanacinthu mwadiya):

-Mbatipambukeni pa gombe. Yezu akhala m'mwadya. Akhapfundzisa anthu mbali m'mwadya.

Yezu amala pfunzisa. Alonga na Simoni:

-Mbatendeni kutali kwa bara, pakati pa bara. Na pa boo ya bara.

Tendeni na andzanu. Ponya makokota m'bara. Simoni atawira:

-Mpfungizi, taphata ntsiku ya mumphu, basa izinji. Tidaphata nyama tayu. Ndinaponya makokota thangwi ndimwe mwalonga. Aponya makokota. Amedza nyama zizinji. Makokota atoma panduka.

Iwo acemera anzawo:

-Bwerani kuno! Tiphedzenimbo. Iyo aaphedza. Makokota akhadadzala na nyama. Myediya yadzala na nyama, iyo ikhafuna kuririma.

Simoni apyona pyonsene ipi. Agodama pa myendo pa Yezu. Simoni alonga tenepa:

-Fedza kule. Ndine nyakudawa. Ndisacita kuipa. Onsene adzumarirwa napyo.

-Adzumarirwa na thangwi ya kuinjipa kwa nyama. Yezu atawira:

-Leka gopa. Bulukira lero kwenda kusogolo unakhala nyakumedza anthu. Iwo akwewa myadiya yawo kuntunda. Asiya pyonsene mbatowerera Yezu.

Mibvunzo:

1. Yezu akakhala pa gombe ipi?
2. Thangwi anji Yezu akwira m'mwadiya?
3. Mbani akhali mwanacinthu mwadiya?
4. Ndi ninji pidacitika pidamala iye pfundzisa anthu?
5. Thangwi anji Simoni atawira kwenda kamedza pontho?
6. Simoni agodama, mbalanga kuna Yezu: Fendeza kule. Ndine nyakudawa. Akhafunabve tayu Yezu? Ndi thangwi yanji alonga penepyo?

Phwandu ya Banja ku Kanaa

(O Casamento em Caná)

Pisagumanika muna Juwau 2:1-11



Ntsiku ibodzi Yezu aenda ku cisa cibodzi. Cisa ceneci cikhacemerwa Kanaa, ku Galileya. Iwo ancemera kuti akhale pabodzi pa phwandu ya banja. Mariya, mai wace Yezu akhalipombo penepo. Phwandu yatoma. Anthu adya, mbamwa. Mbwenye vinyu yamala, phwandu mbidzati kumala. Mariya alonga kuna Yezu kuti:

-Anthu awa nkhabebve vinyu, thangwi yamala.

Yezu atawira kuti:

-Nkaziwe, ine ndinapyonji penepi. Ndzidzi wanga usati kufika.

Mariya, mai wace Yezu, alonga kuna anthu akhaphata basa pa phwandu kuti:



-Imwe citani pire pinakupangani Iye.

Penepo pakhali na nkhalo zitanthatu. Nkhali ibodzi ikhapita anyamagongwe dzana a madzi.

Madjuda akhakhwata nkhalo zenezo pa mabasa awo akucenepa.

Yezu alonga kuna anyabasa kuti:

-Dzadzani nkhalo izi na madzi.

Iwo adzadza nkhalo na madzi. Yezu alonga pontho kuti:

-Cincino bulusani pang'ono muikhe n'khomecho, toera nkadamu wa phwandu alawire.

Anyabasa atunga madzi. Iwo aakhwata mbapasa nkadamu wa phwandu. Iye alawira madzi. Akhalo madzibve tayu, mbwenye asanduka kudza vinyu. Nkadamu wa phwandu hakhapidziwa tayu kuti vinyu eneyo akhalo madzi adasanduza Yezu kudza vinyu.



Anyabasa ndiwo basi akhapidziwa. Nkadamu wa phwandu acemera mwali wa mamuna mbalonga kuti:

-Iwe uciri nayo basi vinyu yadidi mpaka cincino? Anthu anango nkhabe kucita tenepa. Pakutoma asapasa vinyu yadidi, mbamalisira na yakukhonda kudzipa.

Yezu atoma penepo kucita pirengo. Iye apangiza mphambvu zace. Anyakupfundza ace antawira.

Mibvundzo:

1. Yacitwa kupi phwandu ya banja?
2. Ndi ani adaenda na Yezu?
3. Yezu atuma amuna kuti acitenji?
4. Ninji pidacitika na madzi?
5. Thangwi yanji Yezu apangiza mphambvu za Mulungu pa ndzidzi unowu?
6. Pyacitika ntsiku inango Mulungu mbasanduza makhaliro ako toera kunsimba?

Yezu Afamba Padzulu pa Madzi

(Jesus Andou por Cima das Águas)

Pisagumanika muna Marku 6:45-51



Nsiku ibodzi Yezu akhali na anyakupfundza ace. Iye akhaphfundzisa anthu azinji. Anthu akhabva pikhaphfundzisa iye.

Yezu apanga anyakupfundza ace kuti:

-Ndokoni ku Bhetisaidha. Ine ndiri kwenda kapanganizana na anthu.

Yezu apanganizana na anthu. Iye aenda ku phiri kaphembera ekha ene.

Kukhali masiku. Bote ikhali pakati pa nyanza. Ikhacimwana kufamba mwadidi. Anyakupfundza a Yezu akhanentseka. Mphepo ikhadawanga kakamwe. Anyakupfundza akhacimwana kucapa bote.

Yezu akhali dhuzi na nyanza. Iye aona bote na anyakupfundza ace.

Yezu afenzezera dhuzi na bote. Iye afamba padzulu pa madzi. Anyakupfundza ace pidaona iwo Yezu agopa. Akhanyerezera kuti ndi ciphoko.

Yezu aapanga kuti:

-Lekani kugopa tayu. Ndine pano.

Na tenepo, Yezu akwira m'bote mukhali iwo. Mphepo yamatama. Anyakupfundza adzumatirwa napyo.


Mibvundzo

1. Anyakupfundza a Yezu atumiwa kwenda kupi?
2. Pakumala kupanganizana na anthu, Yezu aenda kupi?
3. Ndzidzi onowu ukhali na masikati peno na masiku?
4. Bara ikhali tani?
5. Ndi kupi kudafamba Yezu pakumala kuona anyakupfundza ace?
6. Mbani akhafamba padzulu pa madzi?
7. Ninji cirengo?
8. Cikhali cirengo canji?

Yezu Awangisa Boliboli

(Jesus Cura um Cego)

Pisagumanika muna Marku 10:46-52



Ntsiku inango Yezu abuluka ku nzinda wa Djeriko. Anthu azinji akhantowera.

Boliboli akhacemerwa Bharitimeu, iye akhali n'khundu mwa njira. Boliboli abva kupita kwa anthu. Iye abvundzisa:

-Mbani anapita?

Iwo antawira kuti:





-Ndi Yezu. Boliboli atoma kukhuwa:

Yezu! Mwana wa Dhavidhi! Ndibverenimbo ntsisi!

Anthu anango ampanga tenepa:

-Leka khuwa! Matama!

Mbwenye iye hadamatama tayu. Iye athimiza na kukhuwa
mbalanga tenepa:

-Yezu! Mwana wa Dhavidhi! Ndibverenimbo ntsisi!

Yezu pidabva iye, alimira. Yezu alonga kuti:

-M'bwereseni kuno.

Anthu ampanga kuti:

-Bharitimeu, komerwa! Yezu asafuna kulonga na iwe. Bharitimeu afika pakhali Yezu. Na tenepo, Yezu ambvundza kuti:

-Usafuna ndikucitirenji?

Iye atawira:

-Kuti ndione. Ndisafuna undifungule maso.

Yezu afuthula manja ace. Aphata maso a Bharitimeu. Maso ace afunguka. Bharitimeu atoma kuona, mbatowera Yezu.

Mibvundzo:

1. Dzina yace mbani boliboli?
2. Akhakhala papi?
3. Mbani akhaperekerwa na anthu azinji?
4. Bharitimeu pidakhondeswa iye kukhuwa acitanji?
5. Akhafunanji Bharitimeu kuti acitirwe na Yezu?
6. Yezu antawira tani?

Kuwangiswa kwa Nyamatanya

(A Cura de um Leproso)

Pisagumanika muna Mateu 8:1-4



Ntsiku ibodzi, Yezu akwira pa phiri na anyakupfundza ace. Iye akhala pantsi mbatoma kuapfundzisa. Aapanga pinthu pikhafuna iwo kucita. Pakumalisa alonga tenepa:

-Imwe mungacita pidakupangani ine, munakhala akutsanzaya.

Buluka penepo, Yezu achita pa phiri. Anthu azinji akhantowera. Na tenepo, abwera mamuna m'bodzi akhali na matanya. Iye agodama patsogolo pa Yezu, mbalonga tenepa:

-Mbuya, mungafuna munandiwangisa nthenda yanga.



Yezu afuthula nkono wace.
Ankhuya mbampanga kuti:
-Ine ndisafuna. Wawanga.
Pa ndzidzi ubodzi-bodzi, mamuna
awanga. Matanya amaliratu.
Yezu ampanga tenepa:

-Leka kupanga munthu. Pakutoma
ndoko kapangizike kuna nyantsembe. Iye asafunika akuone
kuti wawangiswa.

Kweneko
unaperekambo
muwoni udalonga
Mozesi, pa pinthu
ninga penepi.




Mibvundzo:

1. Mbani adakwira pa phiri na anyakupfundza?
2. Awangiswa tani nyamatanya?
3. Nyamatanya, an'gumana kupi Yezu?
4. Thangwi yanji mamuna agodama patsogolo pana Yezu?
5. Bukhu iyi isatipfundzisa kuwangiswa kwa nyamatanya. Iwe usafunika udziwe kuti Yezu Kirixtu ndiye ana mphambvu za kuwangisa. Kwa iwe usaona tani makhaliro ako kuna Yezu?

Yezu Awangisa Nyampfutete

(Jesus Cura um Paralítico)

Pisagumanika muna Marku 2:1-12



Ntsiku ibodzi Yezu abwerera ku nzinda wa Kafaranaumi. Onsene apibva kuti iye afika. Onsene aenda kaonana na Iye. Aenda anthu azinji. Onsene akhafuna kuti amubve. Nyumba ikhadadzala na anthu. Ikhadasoweka mbuto n'nyumba. Na kunja kwene ikhadasoweka mbuto. Na pansuwo pene pakhadasoweka mbuto. Yezu akhaphundzisa. Afika anthu anai pakhali Yezu. Iwo abweresa xamwali wawo m'bodzi akhaduala. Ntenda akhali nyampfutete akhacimwana famba. Iye akhagona pa bonde. Axamwali ace acimwana kwenda naye kuna Yezu. Iwo akwira pa ntsoyi ya nyumba. Abulusa maudzu pang'ono. Acita benga pa ntsoyi. Aenda naye kudzulu. Antereza na nkhambala. Yezu aona kuti iwo akhulupira. Iye alonga kuna nyampfutete kuti:

-Mwananga, kudawa kwako kwalekererwa.

Anango anyakudziwisa a mwambo alonga tenepa:

“Thangwi yanji mamuna onowu asalonga tenepa? Nkhabe munthu anakwanisa kulekerera kudawa. Ndiye ene basi Mulungu ana mphambvu! Yezu akhapidziwa pikhanyerezera iwo.”

Na tenepo, Yezu alonga kuti:

-Thangwi yanji musanyerezera tenepo? Ndi ninji pinanensa. Kupanga ntenda kuti: "Walekererwa madawo ako", peno kumpanga kuti: "Lamuka, kwata bonde yako ufambe?"

Ndinakupangisani cinthu cibodzi: Ine ndine mwana wa munthu. Ndina mphambvu zakulekerera madawo.

Yezu apanga nyampfutete kuti:

-Lamuka, kwata bonde yako. Ndoko kunyumba! Onsene aona. Mamuna alamuka. Akwata bonde yace. Aenda ku nyumba. Onsene adzumatirwa napyo. Onsene akuza Mulungu.

Iwo akhalonga tenepa:

-Tadzati kuona pinthu ninga penepi.

Tawira

1. Mbangasi amuna adakwata ntenda kwenda naye kuna Yezu?
2. Nyampfutete afika tani pakakhala Yezu?
3. PisalongerANJI kulekerera?
4. Wabvanji pa cipfundzo ici?
5. Thangwi yanji apfundzisi a mwambo wa Mulungu aipirwa na Yezu?

Yezu Asathamangisa Nzimu wa Kuipa

(Jesus Expulsa um Espírito Mau)

Pisagumanika muna Luka 4:31-36




Yezu akula mu nzinda ung'ono unacemerwa Nazareti. Ndi thangwi eneyo iye asacemerwa Yezu wa ku Nazareti. Anthu a dziko eneyo, anthamangisa Yezu mwenemo.

Yezu abuluka ku Nazareti mbaenda ku nzinda wa Kafaranaumi. Iye akhaphfundzisa anthu ntsiku za Sabudu. Anthu akhadzumarirwa. Iye akhaapfundzisa mwadidi mwene, mbakhalonga na mphambvu za utongi.

Ntsiku inango, Yezu akhaphfundzisa. Penepo pakhali na mamuna m'bodzi akhali na nzimu wa kuipa. Mamuna akhuwa tenepa:

-Tacitanji ife, Yezu wa ku Nazareti? Wabwera kuno kudza katipha? Ine ndisadziwa kuti imwe ndimwe wakulungama.



Ponho ndisadziwa kuti mwatumwa na Mulungu!

Yezu aumatamisa mbalanga kuti:

-Matama. Buluka muna mamuna uyu.

Nzimu wa kuipa wan'gwisa pantsi anthu mbaona. Nzimu wabuluka muna iye, mbukhonda kuncita kuipa.

Ale adapyona, adzumatirwa.

Akhabvundzisana m'bodzi na m'bodzi kuti:

-Ndi ninji penepi? Iye asatongambo mizimu ya kuipa!

Asaitonga na mphambvu za utongi.

Iyo isambvera.

Mibvundzo:

1. Mbani adagwisa mamuna pantsi?
2. Ndi ntsiku yanji ikhaphfundzisa Yezu?
3. Mudabuluka iye ku Nazareti Yezu aenda kupi?
4. Thangwi yanji Yezu asacemerwa wa ku Nazareti?
5. Thangwi yanji tisatongwa kudzumatirwa na Yezu?

Yezu Alamusa Mphale pa Kufa

(Jesus Ressuscita um Rapaz)

Pisagumanika muna Luka 7:11-16



Ntsiku inango, Yezu aenda ku nzinda. Anthu azinji akhantowera. Iye afika dhuzi na nsuwo ukulu wa nzinda.

Pa nzinda unowu, pakhali na nkazi m'bodzi. Iye akhali na mwana wace m'bodzi wa mamuna. Nkazi unowu akhadaferwa na mamuna wace. Mwana wace akhali m'bodzi basi, mwana unowu mbafa pontho. Anthu azinji a mu nzinda aenda ku nyumba kwace kam'matamisa. Asasanyira manungo toera kaaikha ku masiye.

Masiye akhali kunjwa kwa nzinda. Nkazi akhaenda mbalira n'jira.

Mukhabuluka iwo kwene mu nzinda, agumana na Yezu. Yezu aona nkazi mbakhalira. Ambvera ntsisi, mbalonga kuti:

-Nkaziwe, leka kulira!
Anthu akhakwata
baulu, akhafamba basi.
Yezu afika dhuzi na
anthu akhakwata manungo.
Iye akhuya baulu.
Anthu alimira.



Achithisa baulu pantsi.
Na tenepo, Yezu apanga munthu wa kufa kuti:
-Iwe mphale, ndine analonga, lamuka!
Na mwansanga, mphale alamuka mbakhala pantsi.
Yezu ankwata ampasa mai wace. Anthu onsene
adzumatirwa napyo.



Mibvundzo:

1. Mbani adalamusa mphale?
2. Pidafika Iye pansuwo wa nzinda, Yezu agumana ani?
3. Yezu apulumusa tani mphale?
4. Nkazi akhalira anji?
5. Mphale akhadafa. Mai wace akhalira. Nkhabe munthu akhafuna kumphedza. Iwe wamala kuona pirengo ipi. Iwe ungakhala na nyatwa, usanyerezera tani pa makhaliro ako kuna Yezu?

Yezu Amatamisa Conzi

(Jesus Acalma uma Tempestade)

Pisagumanika muna Luka 8:22-25



Ntsiku inango, Yezu na anyakupfundza ace apita m'bote.
Iye aapanga kuti:

-Tendeni ntunda unango wa nyanza.

Na tenepo, atoma wambuka nyanza. Yezu akhali na citulo m'bote. Iye agona. Penepo pene yatoma kupepesa mphepo ikulu n'nyanza. Yapepesa, yapepesa. Na mwansanga cafika conzi cikulu. Madzi akhapita m'bote. Onsene apita mu ngozwi.

Na tenepo, anyakupfundza akhuwa kuti:

- Mpfundzisi! Mpfundzisi! Ife tiri kufa.

Na tenepo, Yezu alamuka.

Iye alonga na utongi onsene kuna mphepo na conzi kuti:

-Matamani. Mphepo na madzi pyambvera.

Ipyo pyacita pire pidalonga Yezu. Pyonsene pyamatama.

Yezu apanga anyakupfundza ace kuti:

-Cikhulupiriro canu ciri kupi? Thangwi yanji mwakhonda kunditawira?

Mbwenye iwo adzudzumika pikulu. Iwo akhagopa. Iwo akhalonga tenepa:

-Munthu wanji onowu? Anatonga mphepo na mabimbi, ipyo mbapimbvera! Ipyo pisacita pire pinalonga Yezu.

Sankhula pinalonga mwadidi:

- Pedhru alimisa mphepo na mabimbi mu nyanza.
- Yezu agona m'bote.
- Anyakupfundza akhadzumatirwa mbakhagopa pikulu.
- Anyakupfundza agonambo.


Mibvundzo:

1. Mbani ana mphambvu za kutonga mphepo na mabimbi?
2. Longa na mafala pang'ono pire pidapfundza iwe pa cipfundzo ici.

Yezu Asapasa Cakudya Mwinji wa Anthu

(Jesus Dá de Comer a uma Multidão)

Pisagumanika muna Luka 9:10-17



Ntsiku ibodzi anyakupfundza a Yezu akhabwerera buluka kukhadatumwa iwo.

Iwo ampanga Yezu kuti:

-Mpfundzisi, tacita pyonsene pidatipanga imwe.

Yezu abuluka na anyakupfundza ace. Iye aenda ku nzinda wa Bhetisaidha. Anthu adziwa kuti Yezu abuluka. Iwo aenda kukhakhala Yezu. Yezu aatambira. Iye atoma kuapanga na thangwi ya ufumu wa Mulungu. Yezu awangisa atenda.

Dzuwa ikhadoka. Anyakupfundza aenda kalonga na Yezu.

Iwo ampanga tenepa:

-Apange anthu aende pyawo. Aende kasake mbuto yakukhala. Anthu aende kasake cakudya, adye.

Yezu atawira mbalanga kuti:

-Imwe ndimwe anafuna kuapasa cakudya.

Anyakupfundza alonga tenepa:

-Ife tina mikate mixanu, na nyama za m'madzi ziwiri basi. Pyacepa. Anthu mbazinji.

Penepo pakhali na anthu akupiringana pikwi pixanu.


Yezu apanga anyakupfundza ace kuti:

-Pangani anthu acite misoka akhale pantsi.

Nsoka ubodzi na ubodzi ukhale na anthu makumaxanu.

Anyakupfundza a Yezu apanga anthu kuti akhale pantsi.

Yezu akwata mikate mixanu na nyama za m'madzi ziwiri. Iye alang'ana kudzulu. Aphemberera mikate na nyama za m'madzi. Aigwanda mbapasa anyakupfundza ace. Iwo agawiza anthu. Anthu onsene adya mbakhuta. Asala mapindi mazinji. Alokota mapindi mbadzaza pitundu khumi na piwiri.




Mibvundzo

1. Mphyanji pikhacita Yezu na anthu, mbadzati kuapasa cakudya?
2. Akhali kupi?
3. Thangwi yanji anyakupfundza ace akhafuna kumwaza anthu?
4. Akhali na mikate mingasi? Na nyama za m'madzi zingasi?
5. Acitanji Yezu toera kupasa anthu cakudya?
6. Penepi pisalongerani?

Yezu Asawangisa Mphale M'bodzi Akhali na Nzimu wa Kuipa

(Jesus Cura um Rapaz que Tinha um Espírito Mau)

Pisagumanika muna Luka 9:37-43




Ntsiku inango, Yezu akhali na anyakupfundza ace. Anthu azinji akhabwera kudza kaonana na Iye. Pakati pa anthu enewa pabulukira mamuna m'bodzi mbakhakhuwa tenepa:

-Mpfundzisi, ndaphata myendo, khalani na ntsisi na mwana wanga wa mamuna. Mwana wanga ndi unowu ekha basi. Iye ana nzimu wa kuipa. Nzimu unowu usanthabusa pikulu kakamwe.

Kazinji kene usan'gwisa pantsi, mbum'bulusa mapobvu n'kanwa. Ungabuluka, usansiya nkhabe mphambvu. Ndaphemba anyakupfundza anu kuti aubuluse. Mbwenye iwo aucimwana.

Yezu alonga tenepa:

-Imwe anthu akusowa cikhulupiriro. Nkhabe kupidziwa pinacita imwe. Ine sinakhala na imwe kwenda na kwenda tayu. M'bwerese kuno mwana wako.



Buluka penepo, mamuna akwata mwana wace mbaenda naye kuna Yezu. Mudafika iye dhuzi na Yezu, nzimu wa kuipa wan'gwisa pantsi. Mphale akomoka.



Penepo, Yezu authamangisa nzimu wa kuipa. Mphale awanga. Iye ampereka kuna baba wace. Anthu onsene apyona penepi. Iwo adzumatirwa pikulu kakamwe na pidacitika.

Mibvundzo:

1. Akhali na nyatwa yanji mamuna?
2. Aphembanji kuna Yezu?
3. Yezu atawira tani?
4. Yezu acita tani kuna mamuna?
5. Anthu adzumatirwa. Iripo ntsiku idadzumatirwa iwe na Mulungu? Lini?

Yezu Asawangisa Madzimola Awiri

(Jesus Cura Dois Cegos)

Pisagumanika muna Mateu 20:29-34



Kazinji kene Yezu akhafamba na mwinji mbakhacita pinthu pya kudzumisa. Iye akhacita pinthu pyadidi kuna anthu onsene. Na thangwi eneyo, anthu akhanfuna.

Ntsiku inango, Yezu abuluka ku cisa ca Djeriko anthu azinji antowera. Dhuzi na pa njira pakhali amuna awiri. Iwo akhali madzimola. Iwo akhakhala pa njira mbakhaphemba pinthu. Pidabva iwo kuti Yezu ali kupita, atoma kukhuwa kuti:

-Mbuya, mwana wa Dhauidhi, tibverenimbo ntsisi!



Anthu akhantowera, akhaamatamisa, mbwenye iwo akhatekereratu na kukhuwa.

-Mwana wa Dhauidhi, tibverenimbo ntsisi!

Yezu na kubva kukhuwa kwawo, alimira. Iye alonga kuti:

-Abwereseni kuno. Amuna awiri afika pakhali Yezu.

Yezu aabvundza kuti:

-Imwe musafunanji?



Iwo atawira kuti:

-Tisafuna kuti imwe Mbuya mutifungule maso.

Na tenepo Yezu aabvera ntsisi mbaphata maso awo. Na mwansanga maso awo afunguka mbatoma kutowera Yezu.

Mbasati kufunguka maso, iwo akhacimwana kuntowera, thangwi pakufamba kwawo pakhafunika munthu wa kuaphata.

Mibvundzo:

1. Akhuwiranji mazimola awiri pidabva iwo kuti Yezu ali kupita?
2. Yezu atawira tani?
3. Acitanji Yezu kuna iwo?
4. Amuna awiri atawira tani?
5. Yezu angaphata basa muna iwe, iwembo usafunika kuti ucitenji?

Munthu M'bodzi basi Adapereka Takhuta kuna Yezu

(Somente uma Pessoa Agradeceu a Jesus)

Pisagumanika muna Luka 17:12-19



Ntsiku inango, Yezu aenda ku Djerusalema. Iye afika pa cisa cibodzi. Abwera amuna khumi. Iwo onsene akhali anyamatanya. Alimira kutali na Iye.

Iwo akhuwa kuti:

-Yezu, tibverenimbo ntsisi!

Yezu aalang'anisa
mbaapanga kuti:

-Ndokoni
mukhapangizike kuna
anyantsembe.

Amuna khumi aenda.
Iwo awanga n'jira, mbasati





Iwo onsene aona kuti:

-Tawangiswa. M'bodzi wawo abwerera kuna Yezu. Iye akhapasa mbiri Mulungu, na kukhuwa kukulu. Pidafika iye pakhali Yezu, agodama pa myendo pace. Apereka takhuta. Iye akhali wa ku Samariya. Yezu ambvundza kuti:

-Mukhali amuna khumi. Monsene mwawangiswa. Andzako apfemba ali kupi? Iwo akhonda bwerera kudza kapereka takhuta kuna Mulungu? Akhonda kupasa mbiri Mulungu? Ndi m'bodzi basi adanyerezera kubwerera pontho pano!

Yezu ampanga mamuna kuti:

-Lamuka. Iwe unako kukhulupira. Na tenepo wapulumuswa. Ndoko pyako kunyumba kwako.

Mibvundzo:

1. Mbani adaenda ku Djerusalema?
2. Pidafika Iye ku Djerusalema, Yezu agumanikana na amuna angasi?
3. Yezu aapanga kuti aende kupi anyamatanya?
4. Thangwi yanji amuna anango apfemba akhonda kwenda kapereka takhuta kuna Mulungu?
5. Nthenda ya matanya isanensa pa makhaliro athu, mbwenye kuna Mulungu nkhabe nensa kuwanga. Iwe m'bale nyakuona bukhu, usanyerezeranji pa makhaliro ako?

Índice

Cirengo Ca Kumedza	3
Phwandu ya Banja ku Kanaa	5
Yezu Afamba Padzulu pa Madzi	8
Yezu Awangisa Boliboli	10
Kuwangiswa kwa Nyamatanya	13
Yezu Awangisa Nyampfutete	15
Yezu Asathamangisa Nzimu wa Kuipa.....	17
Yezu Alamusa Mphale pa Kufa	19
Yezu Amatamisa Conzi	21
Yezu Asapasa Cakudya Mwinji wa Anthu.....	23
Yezu Asawangisa Mphale M'bodzi Akhali na Nzimu wa Kuipa	25
Yezu Asawangisa Madzimola Awiri	28
Munthu M'bodzi basi Adapereka Takhuta kuna Yezu ...	31



LIDEMO.NET

LINGUAS DE MOÇAMBIQUE